



REPÚBLICA DEMOCRÁTICA DE TIMOR-LESTE

MINISTÉRIO DAS FINANÇAS

DIRETRIZ N°01/2009/IVGC/MF

KONA BA PROSEDIMENTU ATU NOMEIA FUNSIONÁRIU HUSI MINISTÉRIU FINANSAS, HODI PARTISIPA IHA TREINU KA KURSU RUMA

Haré ba nesesidade atu dezenvolve kapasidade teknika no profesional ba rekursus umanus iha Ministériu Finansas, hodi bele hametin liu tan qualidade servisu iha ministériu ida ne'e;

Ho baze ba politika IV Governu Konstitusional kona ba dezenvolvimentu rekursus umanus iha Administrasaun Públika, no mós oportunidade barak ne'ebé parseiru dezenvolvimentu sira oferese, atu hametin kapasidade téknika funsionáriu públiku sira nian;

Kaer tuir ba regulamentu ne'ebé vigora, no mós

Ho objetivu atu estabelese sistema no prosedimentu ne'ebé uniforme iha Ministériu Finansas nia laran, kona-ba asuntu ida ne'e:

Ministra Finansas, determina atu sai hanesan diretriz, buat hirak hanesan tuir mai ne'e:

I. DIFINISAUN

Iha Diretriz ida ne'e, TREINU ka TREINAMENTU inklui deit:

- 1. Kursu:** eventu ne'ebé instituisaun ka organizasaun ruma organiza, ho objetivu ne'ebé klaru no espesífiku, iha programa ida ne'ebé sistemátiku atu hasa'e, ka hametin koñesimentu teóricu ka koñsimentu práticu, kona-ba área téknika espesifika ida, no iha durasaun ne'ebé la'os deit loron ida nia laran.
- 2. Semináriu ka 'workshop':** eventu ne'ebé instituisaun ka organizasaun ruma organiza, atu partilla informasaun, rezultadu peskiza ruma, ka rezultadu desizaun konjunta ka global ruma, kona-ba asuntu ho importansia ba ema barak nia moris, ho objetivu atu hasa'e partisipante sira nia koñesimentu, no iha durasaun, bele deit oras balun, to'o loron barak nia laran.

3. **Konferénsia:** eventu ne'ebé instituisaun ka organizaun ruma organiza atu tau hamutuk peritu iha área espesifika ruma, hodi debate kona-ba assuntu ida, ka hodi buka konsensu. Iha konferensia balun, iha mós ka hala'o mós kursu formasaun, no semináriu ka 'workshop'.
4. **Estájiu/vizita estudu:** eventu ne'ebé instituisaun ka organizaun ruma organiza, atu fo'o oportunidade ba tékniku ruma, hodi aprofunda liu tan koñesimentu no esperiênsia iha ninia área téknika, liu husi partisipasaun iha atividade loron-loron instituisaun 'umain' (*host institution*).

Eventu hotu ne'ebé la iha karaterística sira hanesan temi iha leten, la bele konsidera hanesan treinu ka treinamentu.

II. REGRAS JERAIIS

1. Partisipasaun iha treinu ka treinamentu, hanesan difini iha leten, tenki hala'o liu husi respeitu ba regra no prosedimentu ne'ebé difini iha pontu hirak tuir mai.
2. Funsionáriu públiku, no titular kargu direasaun no xefia (diretor no xefi departamentu/seksaun) hotu-hotu iha Ministériu Finansas nia laran, tenki respeita no kumpri prosedimentu ne'ebé difini iha diretriz ida ne'e.
3. Funsionáriu ne'ebé atu hetan nomeasaun hanesan partisipante, tenki prienxe kritériu hanesan tuir mai ne'e:
 - a) Treinu ne'ebé atu tuir, tenki relevante ho ninia funsaun iha Ministériu Finansas nia laran;
 - b) Tenki iha ona estatutu hanesan funsionáriu públiku (la'os ajente administrasaun públika ka kontratadu deit);
 - c) Tenki prienxe kritériu hotu ne'ebé organizador sira difini;
 - d) Tenki iha koñesimentu tékniku sufisiente atu simu informasun foun iha kursu ne'ebé atu tuir;
 - e) Tenki iha koñesimentu sufisiente kona-ba dalen (*language*) ne'ebé uza iha kursu nia laran, katak, bele kompriende di'ak, lê, koa'lia mo'os, no hakerek loloos iha dalen ne'e.
 - f) Sei dauk partisipa iha treinu ne'ebé hanesan. Bele iha esesaun ba kritériu ida ne'e, wainhira:
 - i. Treinu ne'ebé oras ne'e atu tuir, sai hanesan kontinuidade ba treinu seluk ne'ebé tuir tiha ona;
 - ii. La iha tan ona funsionáriu seluk ne'ebé prienxe kritériu atu tuir treinu ida ne'e;
4. Hanesan regra jeral hodi kompleta kritériu ne'ebé temi iha II.3, funsionáriu ida labele uza liu husi 25% husi ninia tempu efetivu serbisu (mais ou menus loron 55, iha tinan ida nia laran), iha deit

reinu ka treinamentu. Esesaun ba regra ia ne'e, bele deit aplika ba funksionáriu ne'ebé presiza atu tuir estájiu, vizita estudu ka treinu spesífiku ruma, ne'ebé dala barak ha'an tempu besik, ka liu 25%, husi tempu efetivu servisu.

5. Hafoin tuir tiha treinu, partisipante ne'ebé selesionadu tenki:
 - a) Hato'o relatóriu pur eskritu ba ninia superior ierárkiku, ho kópia ba Departamentu Jestaun Rekursus Umanus (DJRU) iha Diresaun-Jeral Servisu Korporativus (DJSK);
 - b) Kontakta DJRU atu organiza apresentasaun ba funksionáriu sira seluk iha Ministériu Finansas nia laran, ne'ebé iha funsaun relevante ho matéria ne'ebé nia aprende.

III. PROSEDIMENTU BA NOMEASAUN

1. Wainhira oportunidade/oferta ba treinu ruma tama liu husi Diresaun-Jeral ka Diresaun Nasional ida-idak, Diretor-Jeral ka Diretor Nasional tenki hala'o tuir prosedimentu hanesan tuir mai ne'e:
 - a) Hola desizaun atu haruka partisipante, ho baze ba tuir kritériu hanesan:
 - i. Kursu relevante ka la'e ho atribuisaun no kompeténsia Diresaun-Jeral ka Diresaun Nasional;
 - ii. Iha ka la'e, funksionáriu ne'ebé prienxe kritériu tuir buat ne'ebé difini iha II.3 no pontu II.4
 - iii. Iha finansiamentu ka la'e, i fonte finansiamentu husi ne'ebé.
 - b) Wainhira iha ona desizaun, Diretor-Jeral ka Diretor Nasional tenki halo proposta nomeasaun enderesadu ba Sekretariadu PDP (Programa Dezenvolvimentu Profisional). Sekretariadu PDP sei hala'o verifikasaun kona-ba nomeasaun ne'e, hodi haré ba kritériu ne'ebé difini iha II.3, no II.4, hafoin informa fali Diretor-Jeral ka Diretor Nasional, kona-ba rezultadu verifikasaun.
2. Wainhira oportunidade/oferta ba treinu ruma tama liu husi Gabinetei Ministra ka Vise-Ministru Finansas, Xefi Gabinetei sira sei enkamiña oferta hirak ne'e ba Diresaun-Jeral ne'ebé relevante. Diresaun-Jeral ne'ebé relevante no Sekretariadu PDP tenki hala'o tuir prosedimentu hanesan difini iha III.1.
3. Wainhira oportunidade/oferta ba treinu ruma tama liu husi Diresaun-Jeral Servisu Korporativus (DJSK) ka Sekretariadu PDP, eh wainhira iniciativa atu oferese treinu mai rasik husi Sekretariadu PDP, sekretariadu ne'e tenki fo'o avizu ba Diresaun-Jeral ka Diresaun Nasional ne'ebé relevante, hafoin Diresaun-Jeral ka Diresaun Nasional hirak ne'e, tenki hala'o tuir prosedimentu hanesan difini ona iha III.1.

IV. DISTRIBUISAUN TAREFA HAFOIN HALA'O TIHA NOMEASAUN

Wainhira partisipante ba treinu ruma hetan ona nomeasaun tuir prosedimentu ne'ebé difini iha leten, tarefa ne'ebe iha relasaun ho partisipasaun iha treinu ne'e, sei distribui hanesan tuir mai ne'e:

1. Diresaun-Jeral ka Diresaun Nasional ida-idak tenki organiza lojística kona-ba viajem, kona-ba inskrisaun partisipante nian iha treinu ne'e, responde ba organizador sira, no hala'o mós serbisu lojistikú seluk ne'ebé presiza atu hala'o, liu husi kordenasaun di'ak ho Sekretariadu PDP.
2. Prezidenti Sekretariadu PDP/Diretora-Jeral DJSK, tenki fo'ó instrusaun ba Departamentu Servisu Apoiu Finanseiru iha DJSK nia laran, atu prosesa pagamentu ne'ebé relasiona ho partisipasaun iha treinu ne'e, tuir regulamentu ne'ebé vigora.
3. DJRU iha DJSK tenki hatama naran partisipante, no detalle seluk kona-ba teinu ne'ebé nia tuir, iha baze dadus rekursus umanus. Wainhira treinu remata ona, DJRU tenki halo "follow-up" atu garante katak partisipante hatama duni ninia relatóriu, no halo duni apresentasaun tuir partisipante ninia obrigasaun ne'ebé difini ona iha II.5, iha leten.

V. SANSAUN

Desizaun, atitude, ka komportamentu hotu ne'ebé kontráriu ho konteúdu diretriz ida ne'e, sei sai objetu ba prosesu disiplinar, tuir lei ne'ebé vigora.

Diretriz ida ne'e hahú vigora ohin, 27 Agostu 2009.

Ministra Finansas,

Assinadu
Emilia Pires